

## SEKSYEN 2

# Hasil Kerajaan Persekutuan

**11 PERSPEKTIF KESELURUHAN**

---

**11 HASIL 2022**

---

**13 TINJAUAN 2023**

---

**15 KESIMPULAN**

---



## SEKSYEN 2

# Hasil Kerajaan Persekutuan

## Perspektif Keseluruhan

Ketegangan geopolitik, gangguan rantaian bekalan global dan tekanan inflasi telah memberi impak kepada ekonomi di seluruh dunia pada 2022. Malaysia turut terjejas walaupun secara minimum. Sebagai negara pengeluar komoditi, kenaikan harga komoditi dan penyusutan nilai ringgit berbanding dolar AS telah memberi manfaat yang lebih baik kepada Malaysia melalui hasil berkaitan komoditi. Walau bagaimanapun, Malaysia masih memerlukan struktur hasil yang lebih seimbang dengan mengurangkan kebergantungan kepada hasil bukan cukai dan hasil berasaskan komoditi. Bagi menangani cabaran ini, kutipan hasil yang mampan berteraskan dasar hasil mudah dijangka diperlukan untuk membiayai langkah sosioekonomi bagi menjamin kesejahteraan rakyat.

Dalam hal ini, Malaysia boleh memanfaatkan potensi untuk meningkatkan hasil cukai daripada pembukaan ekonomi dan sempadan antarabangsa yang menggiatkan semula perniagaan dan mengukuhkan pasaran pekerjaan. Dalam Bajet 2022, Kerajaan telah mengumumkan beberapa langkah cukai iaitu pelaksanaan Nombor Pengenalan Cukai (TIN), Program Pengakuan Khas Sukarela (SVDP) di bawah Jabatan Kastam Diraja Malaysia (JKDM) dan peluasan skop duti eksais ke atas minuman bergula. Sementara itu, perundangan cukai sentiasa ditambah baik selaras dengan usaha Kerajaan untuk meningkatkan ketelusan dan pentadbiran cukai. Usaha berterusan juga dilaksanakan bagi memperkukuh pengurusan hasil, menambah baik struktur cukai sedia ada dan

menangani ketirisan hasil berikutan amalan pengelakan cukai rentas sempadan dan dicukai dua kali.

Kerajaan akan terus mengukuhkan penglibatan dengan komuniti perniagaan dan orang awam bagi meningkatkan keberkesanan pengurusan kewangan awam. Sehubungan itu, kertas konsultasi awam telah diterbitkan sebagai usaha meningkatkan ketelusan dan keterangkuman dalam penyediaan Bajet 2023. Penerbitan kertas konsultasi Pelaksanaan *Global Anti-Base Erosion (GloBE) Rules* di Malaysia adalah untuk mendapatkan pandangan bagi memastikan persekitaran pelaburan langsung asing dan domestik yang kompetitif serta mencegah pengelakan cukai rentas sempadan. Input daripada kertas konsultasi yang diperoleh daripada orang awam dan komuniti perniagaan akan memberi perspektif baharu dan boleh dijadikan panduan kepada Kerajaan dalam menjana hasil yang mampan melalui penambahbaikan dasar cukai bagi menyokong agenda nasional.

## Hasil 2022

Hasil Kerajaan Persekutuan pada 2022 diunjur meningkat dengan ketara sebanyak 22% kepada RM285.2 bilion atau 16.7% daripada KDNK disumbangkan oleh hasil cukai dan bukan cukai. Hasil cukai kekal sebagai penyumbang terbesar iaitu 69.5% daripada jumlah hasil atau 11.6% daripada KDNK disokong oleh pemulihan ekonomi yang kukuh dan peningkatan harga komoditi. Peratusan kutipan hasil bukan cukai daripada jumlah hasil dijangka meningkat daripada 25.7% pada 2021 kepada 30.5% pada 2022 berikutan bayaran dividen yang lebih tinggi.

**JADUAL 2.1.** Hasil Kerajaan Persekutuan  
2021 – 2023

KOMPONEN	RM JUTA			PERUBAHAN (%)			BAHAGIAN (%)		
	2021	2022 <sup>1</sup>	2023 <sup>2</sup>	2021	2022 <sup>1</sup>	2023 <sup>2</sup>	2021	2022 <sup>1</sup>	2023 <sup>2</sup>
<b>Hasil cukai</b>	<b>173,704</b>	<b>198,227</b>	<b>205,583</b>	<b>12.5</b>	<b>14.1</b>	<b>3.7</b>	<b>74.3</b>	<b>69.5</b>	<b>75.4</b>
Cukai langsung	130,116	147,206	152,392	15.6	13.1	3.5	55.7	51.6	55.9
<i>antaranya:</i>									
CITA	79,829	84,760	88,870	59.5	6.2	4.8	34.2	29.7	32.6
Individu	27,051	30,640	33,630	-30.6	13.3	9.8	11.6	10.7	12.3
PITA	11,570	19,302	16,189	-9.4	66.8	-16.1	4.9	6.8	5.9
Cukai tidak langsung	43,588	51,021	53,191	4.1	17.1	4.3	18.6	17.9	19.5
<i>antaranya:</i>									
SST	25,616	29,710	32,060	-4.3	16.0	7.9	11.0	10.4	11.8
Duti eksais	10,241	10,720	11,970	3.9	4.7	11.7	4.4	3.7	4.3
Duti import	2,645	3,020	3,220	12.7	14.2	6.6	1.1	1.1	1.2
Duti eksport	2,057	2,200	1,450	175.7	7.0	-34.1	0.9	0.8	0.5
<b>Hasil bukan cukai</b>	<b>60,048</b>	<b>86,990</b>	<b>66,987</b>	<b>-15.0</b>	<b>44.9</b>	<b>-23.0</b>	<b>25.7</b>	<b>30.5</b>	<b>24.6</b>
<i>antaranya:</i>									
Lesen dan permit	10,578	13,330	13,788	-3.2	26.0	3.4	4.5	4.7	5.1
Pendapatan pelaburan	35,018	63,442	42,710	-24.0	81.2	-32.7	15.0	22.2	15.7
<b>Jumlah hasil</b>	<b>233,752</b>	<b>285,217</b>	<b>272,570</b>	<b>3.9</b>	<b>22.0</b>	<b>-4.4</b>	<b>100.0</b>	<b>100.0</b>	<b>100.0</b>
<b>% daripada KDNK</b>	<b>15.1</b>	<b>16.7</b>	<b>15.0</b>						

<sup>1</sup> Anggaran disemak<sup>2</sup> Anggaran belanjawan tidak termasuk langkah Bajet 2023

Sumber: Kementerian Kewangan Malaysia

**Hasil cukai** diunjur meningkat sebanyak 14.1% kepada RM198.2 bilion dengan cukai langsung dan cukai tidak langsung dijangka mencatat pertumbuhan dua digit. Kutipan **cukai langsung** dijangka meningkat sebanyak 13.1% kepada RM147.2 bilion terutamanya disumbangkan oleh kutipan cukai pendapatan syarikat (CITA) yang lebih tinggi sebanyak RM84.8 bilion berikutan pendapatan korporat yang lebih tinggi susulan pemulihan ekonomi yang kukuh. Selaras dengan pengumuman Bajet 2022, pelaksanaan Cukai Makmur secara *one-off* ke atas syarikat dengan pendapatan bercukai melebihi RM100 juta bagi tahun taksiran 2022 dijangka meningkatkan kutipan CITA. Cukai pendapatan individu juga diunjur meningkat kepada RM30.6 bilion seiring dengan prospek pekerjaan dan upah yang lebih baik.

Di samping itu, cukai pendapatan petroleum (PITA) diunjur melonjak 66.8% kepada RM19.3 bilion sejajar dengan peningkatan harga minyak mentah dunia dengan purata USD100 setong (2021: USD71 setong). Kutipan duti setem dianggar meningkat sebanyak 4.7% kepada RM6.6 bilion (2021: RM6.3 bilion) manakala cukai keuntungan harta tanah (CKHT) meningkat 8.5% kepada RM2 bilion (2021: RM1.8 bilion) menggambarkan aktiviti pasaran hartanah yang lebih kukuh antaranya melalui inisiatif Kerajaan di bawah Program Visa Premium Malaysia dan Inisiatif Pemilikan Rumah Keluarga Malaysia (i-MILIKI).

**Cukai tidak langsung** diunjur meningkat sebanyak 17.1% kepada RM51 bilion berikutan kutipan yang lebih tinggi daripada cukai jualan dan cukai perkhidmatan (SST), levi

keuntungan luar biasa dan duti eksais. Anggaran SST yang lebih tinggi berjumlah RM29.7 bilion sejajar dengan pemulihan ekonomi yang kukuh pada 2022 didorong oleh penggunaan swasta. Daripada jumlah ini, cukai perkhidmatan dianggar sebanyak RM14.7 bilion terutamanya disumbangkan oleh kutipan lebih tinggi daripada perkhidmatan makanan dan minuman (F&B), insurans, pengurusan dan telekomunikasi.

Kutipan cukai jualan diunjur lebih tinggi kepada RM15 bilion berikutan peningkatan permintaan kenderaan penumpang serta mesin dan alat ganti. Menurut laporan Persatuan Automotif Malaysia (MAA)<sup>1</sup>, Jumlah Pengeluaran Industri (TIP) meningkat sebanyak 31.4% dan Jumlah Volum Industri (TIV) kenderaan penumpang meningkat 31.2% pada separuh pertama 2022 berbanding tempoh yang sama pada 2021. Kutipan duti eksais juga dijangka meningkat sebanyak 4.7% kepada RM10.7 bilion. Selain itu, levi keuntungan luar biasa ke atas buah kelapa sawit dianggar meningkat dengan ketara sebanyak 70.9% kepada RM3.3 bilion dengan purata harga minyak sawit mentah (CPO) lebih tinggi pada RM5,000 setan metrik. Duti eksport turut diunjur meningkat kepada RM2.2 bilion berikutan peningkatan harga minyak mentah dan CPO serta volum eksport CPO.

**Hasil bukan cukai** dijangka melonjak 44.9% kepada RM87 bilion terutamanya disumbangkan oleh faedah dan pulangan pelaburan yang lebih tinggi. Sebahagian besar hasil ini adalah daripada dividen PETRONAS sebanyak RM50 bilion dengan RM25 bilion merupakan dividen tambahan berikutan keuntungan yang lebih baik manakala dividen Bank Negara Malaysia berjumlah RM5 bilion. Selain itu, Kerajaan juga menerima RM3 bilion daripada Kumpulan Wang Persaraan Diperbadankan (KWAP) untuk membiayai sebahagian bayaran persaraan. Kutipan lesen dan permit dijangka berkembang sebanyak 26% kepada RM13.3 bilion terutamanya

disumbangkan oleh terimaan royalti petroleum, lesen kenderaan bermotor dan levi pekerja asing yang lebih tinggi. Kutipan lesen kenderaan bermotor dijangka meningkat sebanyak 6.1% kepada RM3 bilion berikutan peningkatan pendaftaran kenderaan dan penamatan tempoh pelepasan pembaharuan lesen kenderaan bermotor pada 31 Disember 2021. Selain itu, kutipan levi pekerja asing dianggar meningkat sebanyak 10.9% kepada RM2.2 bilion susulan pertambahan pendaftaran pekerja asing baharu.

**Hasil berkaitan petroleum** pada 2022 dijangka meningkat ketara sebanyak 80.5% kepada RM77.8 bilion dengan bahagian kepada jumlah hasil sebanyak 27.3% disumbangkan terutamanya oleh dividen tambahan daripada PETRONAS. Walau bagaimanapun, bahagian hasil berkaitan petroleum pada 2022 adalah lebih rendah berbanding sumbangan tertinggi yang dicatatkan pada 2009 iaitu 41.3%. Sementara itu, **hasil bukan petroleum** diunjur meningkat sebanyak 8.8% kepada RM207.4 bilion berikutan peningkatan kutipan hasil cukai seiring dengan prestasi ekonomi yang kukuh dan langkah percukaian baharu pada 2022.

## Tinjauan 2023

Tabung Kewangan Antarabangsa (IMF) melaporkan bahawa pertumbuhan ekonomi dunia diunjur lebih perlahan kepada 2.9% pada 2023 berbanding 3.2% pada 2022 berikutan jangkakan pengurangan permintaan global, ketegangan geopolitik yang berpanjangan dan dasar monetari yang diperketat. Oleh itu, unjuran KDNK Malaysia yang berkembang antara 4% dan 5% serta jangkakan harga komoditi global yang sederhana akan menyebabkan pertumbuhan hasil cukai Kerajaan Persekutuan lebih perlahan sebanyak 3.7% iaitu RM205.6 bilion atau 11.3% daripada KDNK. Walau bagaimanapun, hasil bukan cukai dianggar berkurang kepada RM67 bilion

<sup>2</sup> Persatuan Automotif Malaysia. Kajian Pasaran Separuh Pertama 2022. Diambil daripada <http://www.maa.org.my/news.html>

atau 3.7% daripada KDNK iaitu melebihi peningkatan hasil cukai. Secara keseluruhan, hasil Kerajaan Persekutuan diunjur berkurang sebanyak 4.4% kepada RM272.6 bilion.

**Cukai langsung** dianggar meningkat sebanyak 3.5% kepada RM152.4 bilion iaitu 74.1% daripada hasil cukai. Sebahagian besar daripada kenaikan ini disumbangkan oleh kutipan CITA dan cukai pendapatan individu yang lebih baik. Peningkatan kutipan CITA dianggar sebanyak RM88.9 bilion sejajar dengan prospek pendapatan korporat yang stabil serta kutipan Cukai Makmur pada 2023. Selain itu, cukai pendapatan individu diunjur berkembang sebanyak 9.8% kepada RM33.6 bilion berikutan peningkatan upah yang stabil dan pasaran pekerjaan yang kukuh. Di samping itu, hasil cukai langsung lain iaitu duti setem, CKHT dan cukai lain dijangka mencatat sebanyak RM9.9 bilion selari dengan pertumbuhan berterusan subsektor kediaman, peningkatan penawaran rumah mampu milik dan inisiatif Kerajaan menangani harta tanah tidak terjual.

**Cukai tidak langsung** dianggar meningkat sebanyak 4.3% kepada RM53.2 bilion sejajar dengan pertumbuhan berterusan dalam penggunaan dan perdagangan. Kutipan SST dijangka merekodkan RM32 bilion atau 1.8% daripada KDNK dengan cukai jualan diunjur meningkat kepada RM16.3 bilion dan cukai perkhidmatan meningkat kepada RM15.7 bilion manakala duti eksais meningkat kepada RM12 bilion atau 0.7% daripada KDNK. Kutipan cukai perkhidmatan dijangka meningkat terutamanya daripada sektor pelancongan seiring dengan jangkaan peningkatan ketibaan pelancong pada 2023 disokong oleh pelaksanaan Rangka Kerja Pemulihan Pelancongan. Unjuran peningkatan kutipan cukai jualan dan duti eksais disumbangkan terutamanya oleh permintaan berterusan kenderaan bermotor serta mesin dan alat

ganti. Laporan MAA menjangkakan TIV 2023 akan mencapai 636,300 unit berikutan pengenalan model baharu, memenuhi pesanan kenderaan yang tertunggak dan kempen promosi oleh syarikat kereta.

**Hasil bukan cukai** dianggar berkurang sebanyak 23% kepada RM67 bilion atau 3.7% daripada KDNK. Penurunan kutipan disebabkan oleh hasil pendapatan pelaburan yang lebih rendah terutamanya dividen daripada PETRONAS sebanyak RM35 bilion. Sebaliknya, kutipan lesen dan permit dijangka meningkat 3.4% kepada RM13.8 bilion walaupun sumbangan royalti petroleum adalah lebih rendah. Peningkatan ini didorong terutamanya oleh kutipan lesen kenderaan bermotor dan levi pekerja asing. Pendapatan daripada lesen kenderaan bermotor dianggar meningkat kepada RM3.2 bilion sejajar dengan peningkatan pendaftaran kenderaan pada 2023. Selain itu, levi pekerja asing diunjur merekodkan RM2.9 bilion berikutan jangkaan kemasukan pekerja asing yang lebih ramai. Sementara itu, Kerajaan dijangka menerima sumbangan RM3 bilion daripada KWAP dan dividen daripada Bank Negara Malaysia sebanyak RM5 bilion.

**Hasil berkaitan petroleum** 2023 dijangka mencatat RM58.9 bilion atau 21.6% kepada jumlah hasil sejajar dengan andaian purata harga minyak mentah global lebih rendah iaitu USD90 setong. Hasil bukan petroleum diunjur meningkat sebanyak 3% kepada RM213.7 bilion terutamanya disumbangkan oleh CITA, cukai pendapatan individu dan SST seiring dengan aktiviti perdagangan dan ekonomi yang berterusan. **Hasil bukan petroleum** dijangka kekal berdaya tahan dengan mencatat sebanyak 11.8% daripada KDNK. Kerajaan komited untuk memperluas hasil bukan petroleum bagi menjana hasil yang mampan melalui Strategi Hasil Jangka Sederhana (MTRS) dan kajian semula perbelanjaan cukai.


## Kesimpulan

---


Kerajaan akan melaksanakan dasar hasil yang berkesan dan pentadbiran hasil yang cekap bagi menyediakan sokongan fiskal untuk pembangunan negara dan memelihara kesejahteraan rakyat. Dasar ini bukan sahaja mampu menjana pendapatan mampan malah menyumbang kepada pertumbuhan ekonomi yang lebih berdaya tahan, menarik pelaburan lebih tinggi dan meningkatkan kesaksamaan. Walau bagaimanapun, dasar hasil yang berkesan tidak dapat dicapai tanpa pembaharuan fiskal yang kukuh.

Oleh itu, Kerajaan komited untuk mempercepat usaha melaksanakan MTRS, merasionalisasikan insentif cukai, mempelbagaikan sumber hasil dan menambah baik pematuhan cukai bagi meningkatkan hasil. Pembaharuan fiskal yang telah dirancang termasuk penggubalan Akta Tanggungjawab Fiskal akan memastikan kemampuan fiskal dan hutang negara dalam jangka masa sederhana dan panjang. Pembaharuan tersebut akan meningkatkan penjana hasil dan membolehkan Kerajaan mencapai aspirasi menjadi negara berpendapatan tinggi.

**RAJAH 2.1.** Hasil Berkaitan Petroleum dan Bukan Petroleum (% daripada jumlah hasil)



**RAJAH 2.2.** Hasil Sebagai Peratusan daripada KDNK



<sup>1</sup>Anggaran disemak

<sup>2</sup>Anggaran belanjawan tidak termasuk langkah Bajet 2023

Sumber: Kementerian Kewangan Malaysia